



Arolygiaeth Gofal
Cymru
Care Inspectorate
Wales



Memorandwm Cyd-Ddealltwriaeth

Ofsted ac Arolygiaeth Gofal Cymru

Dyma femorandwm cyd-ddealltwriaeth rhwng Arolygiaeth Gofal Cymru (AGC) a'r Swyddfa Safonau mewn Addysg, Gwasanaethau Plant a Sgiliau (Ofsted).

Cyhoeddwyd: Mawrth 2020 Diweddarwyd Rhagfyr 2021

Rhif cyfeirnod: 190044



Corporate member of
Plain English Campaign
Committed to clearer communication

361

Cynnwys

Nodau, diben a chwmpas	3
Egwyddorion cydweithio	3
Dulliau rheoleiddio ac arolygu da	4
Parch at statws annibynnol pob arolygiaeth	4
Llywio gwelliannau er mwyn darparu gofal cymdeithasol diogel	4
Pragmatiaeth a defnyddio adnoddau'n effeithlon ac yn effeithiol	4
Bod mor glir â phosibl	4
Meysydd o gydweithio	5
Cofrestru	6
Pryderon	6
Arolygu	7
Gorfodi	7
Protocol rhannu gwybodaeth	8
Datrys achosion o anghytuno	8
Hyd ac adolygu	8
Atodiad A: Protocol rhannu gwybodaeth	9
Hanes diwygio a chymeradwyo	9
Cyflwyniad	9
Llywodraethu	10
Egwyddorion	10
Gwybodaeth	10
Sail gyfreithiol	11
Perchenogaeth	12
Hawliau	12
Cyfnewid gwybodaeth	13
Prosesau busnes	14
Atodiad A: Partïon	16
Llofnodwyr	17
Atodiad B: Gwybodaeth y gellir ei rhannu	18
Atodiad C: Sail gyfreithiol	20
Rhan A: Y seiliau cyfreithiol i AGC rannu gwybodaeth ag Ofsted	21
Rhan B: Y seiliau cyfreithiol sy'n benodol i Ofsted i rannu gwybodaeth ag AGC	23

Nodau, diben a chwmpas

1. Mae'r memorandwm cyd-ddealltwriaeth rhwng Arolygiaeth Gofal Cymru (AGC) a Phrif Arolygydd Addysg, Gwasanaethau Plant a Sgiliau Ei Mawrhydi (Ofsted). Byddwn yn cyfeirio at y sefydliadau hyn gyda'i gilydd fel 'yr arolygiaethau'.
2. Mae'r memorandwm cyd-ddealltwriaeth yn nodi sut y bydd yr arolygiaethau yn cydweithio i wneud y canlynol:

- osgoi achosion o ddyblygu neu ddryswch
- diogelu buddiannau a hawliau plant ac oedolion sy'n defnyddio gwasanaethau rheoleiddiedig a/neu a gaiff eu harolygu gan un o'r arolygiaethau neu'r ddwy ohonynt.

Bydd hyn yn helpu darparwyr y gwasanaethau hynny i fod yn glir o ran eu hatebolrwydd. Bydd hefyd yn helpu ein staff i wybod pryd a sut i gydlynw ein gwaith.

3. Mae'r memorandwm cyd-ddealltwriaeth hefyd yn nodi:
 - priod gyfrifoldebau Ofsted ac AGC ar gyfer sicrhau gwelliannau yn ogystal â defnyddio dulliau rheoleiddio a gorfodi effeithiol yn y sector gofal cymdeithasol
 - yr egwyddorion a fydd yn gymwys pan fydd gwasanaethau rheoleiddiedig yn cael eu darparu gan yr un darparwr yn y ddwy awdurdodaeth.
4. Nid yw'r memorandwm cyd-ddealltwriaeth hwn yn:
 - drech na chyfrifoldebau a swyddogaethau statudol yr arolygiaethau
 - diwygio unrhyw bolisiau neu gytundebau eraill sy'n ymwneud â'u priod weithgareddau
 - awgrymu y dylid trosglwyddo'r cyfrifoldeb o un i'r llall
 - awgrymu y dylid rhannu cyfrifoldebau statudol.
5. Mae'r memorandwm yn anorfodadwy o dan y gyfraith. Fodd bynnag, mae Ofsted ac AGC yn cytuno y dylid cydymffurfio â'i gyfrifoldebau a rhoi ystyriaeth briodol i swyddogaethau rheoleiddiol ei gilydd.

Egwyddorion cydweithio

6. Wrth gydweithio, bwriad yr arolygiaethau yw y bydd yr egwyddorion canlynol yn nodweddu eu cydberthynas.

Dulliau rheoleiddio ac arolygu da

7. Mae'r arolygiaethau yn ymrwymedig i egwyddorion dulliau rheoleiddio ac arolygu da. Cânt eu nodi gan y Weithrediaeth Gwell Rheoleiddio¹ ac maent yn nodi y dylai dulliau rheoleiddio ac arolygu fod yn:

- gymesur
- atebol
- cyson
- tryloyw
- penodol.

Drwy gyfuno a chydlynu priod weithgareddau'r arolygiaethau, bydd hyn yn eu galluogi i roi'r egwyddorion hyn ar waith yn fwy llwyddiannus na phe baent yn gweithredu heb gyfeirio at y llall. Dylai hefyd helpu gyda chosteffeithlonrwydd.

Parch at statws annibynnol pob arolygiaeth

8. Dylai cydweithio fod yng nghyd-destun cylch gwaith unigol, pwerau statudol, dyletswyddau ac atebolrwydd pob arolygiaeth. Fodd bynnag, dylai dull pob arolygiaeth o gyflawni ei swyddogaethau statudol gyd-fynd â'i gilydd er mwyn:

- osgoi achosion o ddyblygu neu ddryswch
- arwain at ymarfer priod swyddogaethau'r arolygiaeth yn effeithlon ac yn effeithiol.

Llywio gwelliannau er mwyn darparu gofal cymdeithasol diogel

9. Y nod yw y bydd dulliau cydweithio (gan gynnwys rhannu gwybodaeth) yn gwella safonau gofal, lles a diogelwch plant a phobl ifanc mewn gwasanaethau gofal cymdeithasol rheoleiddiedig.

Pragmatiaeth a defnyddio adnoddau'n effeithlon ac yn effeithiol

10. Bydd dull ymarferol o gydweithio yn sicrhau bod prosesau ac adnoddau presennol pob arolygiaeth yn cael eu defnyddio'n effeithlon er mwyn osgoi achosion o ddyblygu lle y bo'n bosibl.

Bod mor glir â phosibl

11. Mae'r memorandwm cyd-ddealltwriaeth hwn yn nodi'r hyn y mae cydweithio yn ei olygu'n ymarferol, gan gynnwys y broses ar gyfer rhannu gwybodaeth a'r protocol ar gyfer rhannu gwybodaeth (ISP).

¹ Mae fframwaith y Weithrediaeth Gwell Rheoleiddio ar gael yn:
www.gov.uk/government/publications/better-regulation-framework

Meysydd o gydweithio

12. Mae meysydd ar gyfer cydweithio a rhannu gwybodaeth yn cynnwys:

- rheoleiddio gwasanaethau maethu a mabwysiadu (gan gynnwys asiantaethau cymorth mabwysiadu, asiantaethau mabwysiadu gwirfoddol ac asiantaethau maethu annibynnol) pan fydd y darparwr yn darparu gwasanaethau yng Nghymru a Lloegr,
- ymchwilio i bobl sy'n darparu gwasanaethau sydd heb eu cofrestru (pan fydd angen cofrestru'r gwasanaethau hynny gydag un o'r arolygiaethau neu'r ddwy ohonynt),
- asesu ceisiadau gan bobl sydd am gofrestru ag un o'r arolygiaethau neu'r ddwy ohonynt
- rhannu gwybodaeth berthnasol am unrhyw ddatblygiadau mewn perthynas â rheoleiddio a/neu arolygu:
 - gwasanaethau maethu a mabwysiadu (gan gynnwys asiantaethau cymorth mabwysiadu, asiantaethau mabwysiadu gwirfoddol ac asiantaethau maethu annibynnol) pan fydd y darparwr yn darparu gwasanaethau yng Nghymru a Lloegr
 - cartrefi plant (cartrefi gofal i blant) a chartrefi diogel i blant pan fydd y darparwr yn darparu gwasanaethau yng Nghymru a Lloegr
 - canolfannau preswyl i deuluoedd sy'n cynnig gwasanaethau i deuluoedd sy'n byw yng Nghymru a Lloegr.

13. O dan Ddeddf Rheoleiddio ac Arolygu Gofal Cymdeithasol (Cymru) (RISCA) 2016, caiff gwasanaethau maethu annibynnol a gwasanaethau mabwysiadu eu nodi fel gwasanaethau rheoleiddiedig a rhaid iddynt gofrestru gydag AGC. O dan Ddeddf Safonau Gofal 2000 (CSA), rhaid i bob asiantaeth maethu annibynnol ac asiantaethau mabwysiadu sydd â'u prif swyddfeydd yn Lloegr gofrestru ag Ofsted. Er bod angen i bob cangen o asiantaeth maethu gofrestru a chael ei harolygu ar wahân, un arolygiad a gynhelir ar gyfer asiantaethau mabwysiadu gwirfoddol, ni waeth sawl safle a ddefnyddir.

14. O dan RISCA, rhaid i unrhyw berson sy'n darparu gwasanaeth rheoleiddiedig yng Nghymru gofrestru yng Nghymru. Rhaid i ddarparwyr gwasanaethau mabwysiadu neu faethu yng Nghymru gofrestru gydag AGC, ni waeth ble mae'r gangen neu'r swyddfa wedi'i lleoli. Felly, bydd angen i rai darparwyr (y rheini sydd â'u prif swyddfeydd yn Lloegr yn bennaf ac sy'n darparu gwasanaethau mewn cangen, swyddfa neu leoliad arall yng Nghymru), gofrestru gydag AGC ac Ofsted a byddant yn ddarostyngedig i'r fframwaith rheoleiddio o dan CSA a RISCA.

Cofrestru

15. Bydd AGC ac Ofsted yn rhannu gwybodaeth i ddelio â'r broses o gofrestru darparwyr pan fydd y darparwr wedi datgan, neu pan fydd yr arolygiaeth yn canfod (drwy'r broses gwneud cais neu fel arall) bod yr arolygiaeth arall wedi'i wrthod rhag cofrestru neu wedi gohirio ei gofrestriad.
16. Bydd y wybodaeth a rennir yn berthnasol i weithgarwch cofrestru AGC ac Ofsted. Bydd y cais am wybodaeth gofrestru yn:
 - nodi'r rheswm/rhesymau dros ofyn am y wybodaeth
 - nodi'r darparwr, gan gynnwys enw a rhif cwmni'r darparwr, enwau'r cyfarwyddwyr a'r unigolyn cyfrifol/rheolwr lle y bo'n berthnasol
 - gofyn a oes unrhyw un o'r unigolion a enwyd:
 - wedi'i wrthod rhag cofrestru
 - wedi cael cofrestriad wedi'i ohirio
 - wedi derbyn hysbysiad gorfodi statudol
 - wedi'i anghymwyso rhag gofalu am blant (ar yr amod bod y wybodaeth ar gael i'r arolygiaeth)
 - gofyn am unrhyw wybodaeth arall a all fod yn berthnasol i addasrwydd y darparwr i ddarparu gwasanaeth rheoleiddiedig.
17. Diben rhannu'r wybodaeth hon fydd llywio penderfyniadau yn ymwneud ag addasrwydd yn ystod y broses gofrestru er mwyn sicrhau mai dim ond personau addas sy'n cael eu cofrestru i ddarparu gwasanaethau rheoleiddiedig.
18. Caiff ceisiadau am wybodaeth gofrestru eu hanfon at staff a nodwyd ym mhob arolygiaeth, fel y nodir yn Atodiad A.
19. Bydd AGC ac Ofsted yn ceisio ymateb i geisiadau am wybodaeth cofrestru o fewn 10 diwrnod gwaith.

Pryderon

20. Bydd AGC ac Ofsted yn rhannu gwybodaeth am bryderon sylweddol (e.e. pryderon ynglŷn â diogelu neu bryderon am anghysondebau ariannol) a allai fod yn berthnasol i ansawdd a diogelwch gwasanaeth o fewn meysydd cydweithio, fel y disgrifir uchod.
21. Bydd AGC ac Ofsted yn rhannu gwybodaeth am bryderon sylweddol yn ymwneud ag ymarfer awdurdodau lleol pan fydd y wybodaeth hon yn berthnasol i'w priod swyddogaethau rheoleiddiol. Er enghraifft, byddant yn rhannu gwybodaeth am achosion lle gallai plant sy'n derbyn gofal fod wedi'i lleoli yn amhriodol.

22. Diben rhannu gwybodaeth am bryderon sylweddol fydd codi ymwybyddiaeth o risgiau posibl a/neu wirioneddol i'r rheini sy'n defnyddio gwasanaethau rheoleiddiedig. Nod hyn yw eu diogelu a datrys unrhyw bryderon sylweddol yn gynt.

Arolygu

23. Bydd AGC ac Ofsted yn rhannu adroddiadau arolygu terfynol gwasanaethau mabwysiadu a maethu sydd wedi'u cofrestru â'r ddwy.
24. Pan fydd AGC neu Ofsted yn ystyried cymryd camau gorfodi yn erbyn darparwr sydd wedi'i gofrestru â'r ddwy, bydd yr arolygiaeth berthnasol yn rhoi gwybod i'r llall am natur y camau gorfodi a'r rhesymau drostynt cyn gynted ag y mae'n rhesymol bosibl. Yn yr amgylchiadau hyn, mae'n bosibl y bydd yr arolygiaethau yn rhannu mwy o wybodaeth i gefnogi eu priod swyddogaethau rheoleiddiol, er enghraifft, gwybodaeth a allai fod yn berthnasol i addasrwydd darparwr.
25. Diben rhannu'r wybodaeth hon am arolygu a gorfodi fydd:
- codi ymwybyddiaeth o risgiau posibl a/neu wirioneddol i'r rheini sy'n defnyddio gwasanaethau rheoleiddiedig
 - galluogi'r ddwy arolygiaeth i gymryd camau rheoleiddio priodol.

Gorfodi

26. Bydd yr arolygiaethau yn rhannu gwybodaeth am gydymffurfiaeth statudol a chamau gorfodi, gan gynnwys gorfodaeth droseddol, mewn perthynas â gwasanaethau mabwysiadu neu faethu pan fydd y darparwr yn darparu gwasanaethau yng Nghymru a Lloegr.
27. Bydd AGC ac Ofsted yn rhannu gwybodaeth am gydymffurfiaeth statudol a chamau gorfodi mewn perthynas â chartrefi plant pan fydd y wybodaeth honno yn berthnasol i swyddogaethau a pherfformiad y rheoleiddiwr arall.
28. Diben rhannu gwybodaeth am gydymffurfiaeth statudol a chamau gorfodi yw:
- codi ymwybyddiaeth o risgiau posibl a/neu wirioneddol i'r rheini sy'n defnyddio gwasanaethau y mae'r camau gorfodi wedi effeithio arnynt
 - sicrhau bod camau rheoleiddio priodol yn cael eu cymryd.
- Er mwyn osgoi amheuaeth, ni fydd y naill arolygiaeth yn ceisio dylanwadu ar benderfyniad y llall mewn perthynas â chamau gorfodi neu reoleiddio.
29. Lle y bo angen, bydd yr arolygiaethau yn darparu tystiolaeth i lywio a chefnogi camau gorfodi rheoleiddiol neu erlyniad troseddol y llall. Gall y dystiolaeth a ddarperir gynnwys y dystiolaeth a gasglwyd yn ystod arolygiadau yn ogystal â datganiadau tystion.

Protocol rhannu gwybodaeth

30. Mewn rhai amgylchiadau, gall dulliau cydweithio effeithiol ei gwneud yn ofynnol i'r arolygiaethau gyfnewid gwybodaeth gan gynnwys yr hyn a nodir yn yr adran hon o'r memorandwm cyd-ddealltwriaeth. Mae'r arolygiaethau yn cydnabod y bydd penderfyniad i rannu gwybodaeth:
- yn cael ei benderfynu fesul achos
 - bob amser yn gorfod cydymffurfio ag unrhyw gyfraith gymwys, egwyddor diogelu data, cod ymarfer, canllawiau a'r protocol rhannu gwybodaeth y cytunwyd arno yn Atodiad A.
31. Mae'r protocol rhannu gwybodaeth yn Atodiad A yn nodi'r sail a'r trefniadau ar gyfer rheoli'r broses o gyfnewid gwybodaeth rhwng yr arolygiaethau.

Datrys achosion o anghytuno

32. Bydd y ddwy arolygiaeth yn enwebu swyddogion ar gyfer rheoli'r dulliau o gydweithio a rhannu gwybodaeth o ddydd i ddydd fel y nodir yn y memorandwm cyd-ddealltwriaeth hwn. Fel arfer, caiff unrhyw achos o anghytuno ei ddatrys yn gyflym ar lefel weithredol neu drwy'r swyddogion enwebedig hyn. Os na fydd hyn yn bosibl, gall y mater gael ei atgyfeirio i Gyfarwyddwr Gofal Cymdeithasol Cenedlaethol Ofsted a Dirprwy Brif Arolygydd AGC, a fydd yn gyfrifol am lunio datrysiad boddhaol ar y cyd.

Hyd ac adolygu

33. Daw'r memorandwm cyd-ddealltwriaeth hwn i rym ar 1 Ebrill 2020. Bydd yn parhau i fod mewn grym nes bydd un parti neu'r ddau ohonynt yn ei ddirymu.
34. Caiff y memorandwm cyd-ddealltwriaeth ei adolygu o leiaf bob tair blynedd neu pryd bynnag y caiff y newidiadau i'r fframwaith deddfwriaethol perthnasol eu cynnig neu eu cyflwyno.

Margaret Rooney

.....
Dirprwy Brif Arolygydd
Arolygiaeth Gofal Cymru

Yvette Stanley

.....
Cyfarwyddwr Cenedlaethol, Gofal
Cymdeithasol
Ofsted

Atodiad A: Protocol rhannu gwybodaeth

Hanes diwygio a chymeradwyo

Fersiwn	Disgrifiad o'r diwygiad	DBS
1.0	Fersiwn gyntaf a gyhoeddwyd	3 Mawrth 2020
2.0	Ail fersiwn a gyhoeddwyd	10 Rhagfyr 2021

Cyflwyniad

Mae'r protocol rhannu gwybodaeth hwn yn nodi'r sail a'r trefniadau ar gyfer rheoli'r broses o gyfnewid gwybodaeth rhwng yr arolygiaethau, AGC ac Ofsted.

Noder nad yw'r protocol rhannu gwybodaeth hwn yn drefniant amgen yn lle defnyddio ceisiadau rhyddid gwybodaeth neu geisiadau gwrthrych i weld data y mae ganddynt eu prosesau gwahanol eu hunain.

Nodau'r protocol rhannu gwybodaeth hwn yw:

- amlinellu'r egwyddorion y bydd yr arolygiaethau yn eu defnyddio ar gyfer rhannu gwybodaeth
- creu templed cyffredin ar gyfer rhannu gwybodaeth rhwng yr arolygiaethau
- sicrhau cydymffurfiaeth â'r rheoliadau ynglŷn â chofnodion cyhoeddus a diogelu data.

Mae prif gorff y protocol rhannu gwybodaeth yn nodi'r egwyddorion cyffredinol o ran y ffordd y bydd y partion yn gweithio gyda'i gilydd. Ceir nifer o atodiadau sy'n rhoi rhagor o fanylion, sef:

- Atodiad A: Partneriaid – Mae hwn yn rhoi manylion am yr arolygiaethau, y prif enwau cyswllt ar gyfer y protocol rhannu gwybodaeth hwn ac unrhyw ganllawiau ychwanegol o ran y ffordd y mae'r arolygiaethau yn cytuno i gydweithio.
- Atodiad B: Gwybodaeth – Mae hwn yn dangos y prif categorïau o wybodaeth reoleiddiol a gwybodaeth fusnes y bydd yr arolygiaethau yn ei rhannu ac yn rhoi crynodeb o'r rhesymeg dros rannu'r wybodaeth hon.
- Atodiad C: Sail gyfreithiol – Mae hwn yn crynhoi'r sail gyfreithiol dros rannu'r wybodaeth.

Er nad yw'n ddogfen gyfreithiol gyfrwymol, mae'r protocol rhannu gwybodaeth hwn yn dangos bwriad yr arolygiaethau i gyflawni eu dyletswyddau rheoleiddiol drwy rannu gwybodaeth yn gyfreithlon er mwyn diogelu llesiant y defnyddwyr gwasanaethau.

Llywodraethu

Bydd AGC yn cadw meistrbrotocol rhannu gwybodaeth yn seiliedig ar y templed hwn ar gyfer Protocol Rhannu Gwybodaeth. Bydd y meistrbrotocol rhannu gwybodaeth yn coladu'r manylion o'r holl brotocolau rhannu gwybodaeth rhwng AGC a sefydliadau eraill. Caiff y meistrbrotocol rhannu gwybodaeth ei adolygu o leiaf bob tair blynedd a'i ddosbarthu i bob sefydliad y mae ganddo brotocol rhannu gwybodaeth ag AGC.

Pan fydd newidiadau a fydd yn effeithio ar y trefniadau o dan y protocol rhannu gwybodaeth hwn, mae'n rhaid i'r partïon hysbysu ei gilydd yn ddi-oed. Os bydd anghytuno, dylid defnyddio'r enwau cyswllt a restrir yn Atodiad A yn y lle cyntaf i gydgyssylltu er mwyn cael datrysiad priodol. Os oes angen terfynu'r protocol rhannu gwybodaeth, dylai'r partïon wneud pob ymdrech i roi o leiaf fis calendr o rybudd am y dyddiad terfynu arfaethedig.

Egwyddorion

Bydd yr arolygiaethau yn rhannu gwybodaeth gan ddilyn yr egwyddorion hyn.

- Caiff gwybodaeth ei rhannu'n rhagweithiol er mwyn cefnogi swyddogaethau perthnasol pob arolygiaeth.
- Pan fydd budd cyffredin rhwng yr arolygiaethau (megis adroddiadau cyhoeddus neu gyhoeddiadau yn y cyfryngau), bydd yr arolygiaethau yn cydweithio i rannu gwybodaeth. Nod hyn yw lleihau'r baich ar yr arolygiaethau ac osgoi achosion o ddryswch neu ddyblygu.
- Rhaid i ddulliau rhannu gwybodaeth fod:
 - yn berthnasol i swyddogaethau'r arolygiaeth
 - yn gymesur i'r tasgau gofynnol
 - yn angenrheidiol i gyflawni'r dibenion gofynnol
 - wedi'u cyfiawnhau'n gyfreithiol.
- Bydd rhannu gwybodaeth wedi'i gyfyngu i'r aelodau hynny o'r staff yn y ddwy arolygiaeth y mae eu rolau yn ei gwneud yn ofynnol iddynt brosesu'r wybodaeth honno.

Disgrifir meysydd eraill o reoli gwybodaeth (megis diogelwch, trosglwyddo, sail gyfreithiol a hawliau) isod.

Gwybodaeth

Mae'r arolygiaethau yn dal amrywiaeth o wybodaeth ar ffurf copi caled ac yn ddigidol er mwyn cefnogi eu swyddogaethau. Categoriâu cyffredinol y swyddogaethau hyn yw:

- cofrestru a rheoleiddio gwasanaethau a darparwyr gofal
- arolygu gwasanaethau a darparwyr gofal

- gorfodi safonau ar draws gwasanaethau a darparwyr gofal
- ymchwilio i bersonau sy'n darparu gwasanaethau rheoleiddiedig heb gofrestru
- arolygu a gwerthuso perfformiad gwasanaethau cymdeithasol awdurdodau lleol.

Fodd bynnag, gall gwybodaeth symud yn hawdd rhwng y meysydd swyddogaethol hyn. Er enghraifft, gall arolygiad ddatgelu pryder sylweddol ynglŷn â statws cofrestriad gwasanaeth gofal. Efallai bod y gwasanaeth gofal yn dod o dan ddarparwr gofal awdurdod lleol ac mae ymchwiliad pellach i'r pryder sylweddol yn arwain at gamau gorfodi. Mae angen deall y berthynas gymhleth rhwng gwybodaeth am ei bod yn adlewyrchu'r ffordd y gellir rhannu gwybodaeth. Nid oes modd categoreiddio gwybodaeth o dan un swyddogaeth benodol bob amser, felly, wrth rannu, mae'r pwyslais ar sicrhau bod y wybodaeth yn berthnasol, yn angenrheidiol ac yn gymesur â nod bwriadedig rhannu o'r fath.

Mae rhesymau pwysig pam y caiff gwybodaeth ei rhannu. Mae'r rhain wedi'u crynhoi, yn erbyn amrywiol categorïau o wybodaeth yn y tabl yn Atodiad B y protocol rhannu gwybodaeth hwn.

Mae'r ffordd y mae'r arolygiaethau yn ymdrin â'r wybodaeth bersonol a dderbynnir gennym wedi'i nodi yn ein hysbysiadau preifatrwydd sydd wedi'u cyhoeddi². Er enghraifft, os derbynnir pryder sylweddol oddi wrth sefydliad arall, ymdrinnir ag ef fel petai'n un o bryderon sylweddol yr arolygiaeth ei hun o adeg ei dderbyn. Mae hysbysiadau preifatrwydd hefyd yn cynnwys cyfeiriadau at amserlenni cadw. Mae'r rhain yn bwysig gan eu bod yn effeithio ar argaeledd gwybodaeth dros amser, a all fod yn ffactor hollbwysig mewn prosesau busnes megis gweithgareddau gorfodi. Mae hysbysiadau preifatrwydd hefyd yn cynnwys cyfeiriadau at y sefydliadau hynny y mae'r arolygiaethau yn rhannu gwybodaeth â nhw.

Sail gyfreithiol

Mae'n rhaid bod sail gyfreithiol ddigonol dros rannu gwybodaeth rhwng yr arolygiaethau. Ceir crynodeb o'r seiliau cyfreithiol hyn yn Atodiad C. Gall y sail gyfreithiol fod yn berthnasol i fath penodol o wybodaeth y mae angen ei rhannu (megis pryderon ynglŷn â diogelwch defnyddwyr gwasanaethau) neu i swyddogaethau penodol sefydliad (megis gwiriadau cofrestru rhwng sefydliadau sydd â swyddogaethau rheoleiddio cysylltiedig).

² Mae Hysbysiad Preifatrwydd AGC ar gael yn: www.arolygiaethgofal.cymru/sut-rydym-yn-defnyddioch-gwybodaeth-bersonol. Mae Hysbysiad Preifatrwydd Ofsted ar gael yn: www.gov.uk/government/publications/ofsted-privacy-notices/social-care-ofsted-privacy-notice#local-authority-childrens-services

At hynny, mae angen i'r sail gyfreithiol fod yn gyson â sensitifrwydd y wybodaeth. Gellir rhannu'r sensitifrwydd yn dri chategori bras:

- ddim yn bersonol: gwybodaeth wedi'i hanonymeiddio yn y ffordd arferol a ddefnyddir wrth ddadansoddi ystadegau
- personol: gwybodaeth lle y gellir adnabod unigolyn, naill ai'n uniongyrchol (drwy enw) neu'n anuniongyrchol (drwy ddiddwytho o wybodaeth gyd-destunol a ddarperir)
- categori arbennig: gwybodaeth sensitif am unigolion sy'n ymwneud â meysydd megis iechyd, rhywioldeb, crefydd ac ati.

Fodd bynnag, bydd amgylchiadau eithriadol bob amser yn codi pan fydd yn rhaid i wybodaeth gael ei rhannu er mwyn diogelu llesiant defnyddwyr gwasanaethau ond nad ydynt wedi'u cwmpasu'n benodol o dan y protocol rhannu gwybodaeth hwn. O dan yr amgylchiadau hynny, mae llesiant defnyddwyr gwasanaethau o'r pwys mwyaf ac mae'n rhaid i'r wybodaeth gael ei rhannu. Dylai'r sail gyfreithiol dros hyn gael ei chadarnhau fel blaenoriaeth. Dylai'r arolygiaethau roi gwybod i'w gilydd am yr amgylchiadau eithriadol cyn gynted â phosibl ar ôl y math hwn o ddigwyddiad, gan ddefnyddio'r manylion cyswllt a nodir yn Atodiad A y protocol rhannu gwybodaeth hwn. Yna, gellir defnyddio'r wybodaeth hon i ddiweddarau ein protocol rhannu gwybodaeth er mwyn sicrhau bod sefyllfaoedd tebyg yn gliriach yn y dyfodol.

Perchenogaeth

Y rheolydd data sy'n penderfynu ar y rheswm dros brosesu data personol yn ogystal â'r dull a ddefnyddir. Mae hyn yn rhoi cyfrifoldebau penodol ar sefydliad o dan ddeddfwriaeth diogelu data'r DU:

- Rheoliadau Cyffredinol ar Ddiogelu Data y DU (UK GDPR)
- Deddf Diogelu Data'r DU 2018.

Pan fydd gwybodaeth yn cael ei rhannu â sefydliadau eraill, bydd y sefydliadau sy'n ei hanfon ac sy'n ei derbyn yn rheolyddion data annibynnol. Mae hyn yn dynodi bod y wybodaeth yn cael ei throsglwyddo'n gyfan gwbl o reolaeth y sefydliad sy'n anfon i'r sefydliad sy'n derbyn. Yna, gall y sefydliad sy'n derbyn ddefnyddio'r wybodaeth honno yn unol â'i swyddogaethau ei hun.

Hawliau

Mae'r arolygiaethau yn cytuno i gynnal hawliau gwrthrych data mewn perthynas ag unrhyw wybodaeth bersonol a rennir. Noder mai ystyr 'gwrthrych data' yw'r unigolyn byw adnabyddedig neu adnabyddadwy y mae'r data personol yn ymwneud ag ef. Er enghraifft, gallai hyn gyfeirio at ddiweddarau gwybodaeth a rennir y canfuwyd ei bod yn anghywir.

Mae'n rhaid i'r arolygwyr fod yn ymwybodol bob amser o hawliau statudol y gwrthrych data a chynorthwyo ei gilydd er mwyn cynnal y rhain yn ôl yr angen.

Os bydd tor-diogelwch data mae'n rhaid i'r rhai sy'n ymwneud â rhannu'r wybodaeth honno gael eu hysbysu cyn gynted â phosibl. Pan roddir gwybod am achos o dor-diogelwch data, rhaid cynnal adolygiad i ddeall amgylchiadau'r tor-diogelwch, llunio cynllun gweithredu adferol ac asesu hyfywedd y protocol rhannu gwybodaeth yn y dyfodol.

Lle y bwriedir datgelu gwybodaeth a rennir i drydydd partïon, dylid bob amser ystyried hawliau'r parti gwreiddiol a'r effaith arni. Mae hyn yn arbennig o bwysig gan y gallai'r wybodaeth a rennir effeithio'n andwyol ar y parti gwreiddiol. Mae hyn yn cynnwys ymateb i geisiadau Rhyddid Gwybodaeth a rhyngweithio tebyg â thrydydd partïon.

Dylai arolygiaethau ystyried rhoi gwybod i wrthrych y data neu ei gynrychiolwyr cyfreithlon bod angen iddynt rannu eu gwybodaeth (ac ystyried unrhyw ofyniad i gael eu caniatâd) cyn gynted â phosibl. Bydd hyn yn ystyried ymarferoldeb cysylltu â gwrthrych y data, y risg o niwed i eraill a'r risg o lesteirio unrhyw ymchwiliadau neu achosion cyfreithiol cysylltiedig. Pe cysylltid â gwrthrych, byddai hynny'n cael ei wneud i'w hysbysu am ba wybodaeth bersonol a gaiff ei rhannu, gyda phwy ac at ba ddibenion.

Cyfnewid gwybodaeth

Y sawl sy'n anfon y wybodaeth yn wreiddiol sy'n gyfrifol am ansawdd y wybodaeth a rennir. Mae'n bwysig bod yr ansawdd hwn wedi'i ddiffinio wrth rannu gwybodaeth fel na fydd unrhyw gamdybiaethau. Gallai hyn, er enghraifft, gynnwys yr amser/amserlen ar gyfer casglu'r wybodaeth yn wreiddiol a sut y cafodd ei chasglu neu ddatganiad y deallir bod y wybodaeth yn gywir ar adeg ei hanfon.

Caiff ceisiadau ad hoc am wybodaeth ei phrosesu cyn gynted ag y bo modd. Oherwydd natur gymhleth ac amrywiol iawn ceisiadau nid oes modd rhoi cytundeb lefel gwasanaeth diffiniol ar gyfer amseroedd ymateb. Er mwyn lliniaru hyn, dylai ymateb cychwynnol o fewn 10 diwrnod gwaith i dderbyn cais roi brasamcan o'r amser sydd ei angen i gwblhau'r cais yn llawn.

Pryd bynnag y caiff gwybodaeth ei rhannu mae'n rhaid gwneud hynny mewn ffordd ddiogel. Dangosir amlinelliaid cyffredinol o'r ffyrdd y gellir gwneud hyn isod. Gan fod y dulliau yn gallu newid yn rheolaidd, dylai pob parti ymgynghori â'i swyddogion arweiniol ym maes diogelwch gwybodaeth er mwyn sicrhau ei fod yn cydymffurfio ac yn gyfredol.

- Gwybodaeth sydd ar gael yn gyhoeddus: Nid oes angen unrhyw fesurau diogelu arbennig.
- Gwybodaeth sensitif (copi caled): Fel arfer, mae hyn yn cynnwys pecynnu gwybodaeth yn ddiogel (e.e. lapio dwbl) a ffordd o fonitro'r broses gludo (e.e. olrhain pecynnau neu ddefnyddio gwasanaeth cludo).
- Gwybodaeth sensitif (ddigidol):

- Rhwydweithiau dibynadwy: Mae rhwydweithiau diogel y gellir eu defnyddio heb fesurau diogelu pellach ychwanegol. Mae'r arolygiaethau yn cadw rhestrau ohonynt ar dudalennau eu mewnwrwyd.
- Gwasanaeth diogel (ar-lein): Fel arfer, mae'r rhain yn wasanaethau wedi'u caffael sy'n cynnig dull diogel o anfon cynnwys digidol rhwng gwahanol sefydliadau (e.e. amgryptio e-byst).
- Gwasanaeth diogel (all-lein): Fel arfer, mae'r rhain yn ddyfeisiau storio digidol wedi'u diogelu drwy gyfrinair megis disgiau neu gofau bach. Yn aml iawn, maent yn fwy addas ar gyfer trosglwyddo symiau mwy o wybodaeth ddigidol. Mae'r arolygiaethau yn darparu rhestrau o ddyfeisiau a gymeradwywyd ar dudalennau eu mewnwrwyd.

Mae'n rhaid i'r arolygiaethau sicrhau bod prosesau busnes a'r seilwaith digidol a ffisegol yn diogelu pob darn o wybodaeth a rennir, boed hynny ar ffurf copi caled neu'n ddigidol. Dylai hyn fod yn unol ag arfer gorau'r diwydiant megis ISO27001 neu Cyber Essentials, a'r safonau a bennwyd ar gyfer cyrff cyhoeddus megis fframwaith polisi diogelwch y llywodraeth. Mae'r mesurau hyn yn cynnwys:

- gorfodi'r lefelau cywir o fynediad at wybodaeth (e.e. defnyddio gwe-letya diogel, mewngofrestru diogel)
- sicrhau parhad gwybodaeth (e.e. creu copïau wrth gefn yn rheolaidd oddi ar y safle)
- diogelu gwybodaeth rhag ymosodiad maleisus (e.e. defnyddio mesurau diogelwch rhag feirysau a waliau tân)
- sicrhau bod unrhyw drydydd parti sy'n prosesu gwybodaeth yn cadw at y rheoliadau sy'n llywodraethu'r broses o ymdrin â gwybodaeth bersonol (e.e. drwy drefniadau cytundebol).

Prosesau busnes

Mae'r protocol rhannu gwybodaeth hwn wedi'i deilwra ar gyfer rhannu gwybodaeth rhwng yr arolygiaethau i gefnogi eu swyddogaethau statudol. Fodd bynnag, efallai y bydd angen cydlynu ein priod brosesau busnes, boed hynny'n uniongyrchol neu'n anuniongyrchol, mewn perthynas â rhannu gwybodaeth.

Er mwyn cydlynu prosesau busnes mae'n rhaid i gyfranogi gweithredol fod yn llwyddiannus. Er y gall y protocol rhannu gwybodaeth hwn helpu i bennu egwyddorion cydweithio, ni all fod yn gyfredol bob amser yn sgil y newidiadau rheolaidd a chyflym mynych i amgylcheddau gweithredol. Y ffordd orau o hwyluso'r cydweithrediad hwn yw bod yr arolygiaethau yn cyfarfod er mwyn rheoli'r prosesau cymorth ac atgyfnerthu cydberthnasau gwaith.

Er bod y protocol rhannu gwybodaeth hwn yn diffinio'r rheolaethau ynglŷn â rhannu gwybodaeth, dylai'r prosesau busnes ganolbwyntio ar y gwaith ategol y mae angen ei wneud o ddydd i ddydd mewn amgylcheddau gweithredol. Gallai hyn gynnwys:

- nodi newidiadau y mae angen eu gwneud i'r protocol rhannu gwybodaeth hwn
- cadarnhau manylion cyswllt, gan gynnwys y rhai sy'n anfon ac yn derbyn gwybodaeth
- darparu ffurflenni er mwyn cyflymu'r broses o rannu gwybodaeth
- sicrhau y caiff gwybodaeth ei phrosesu'n unol â'r protocol rhannu gwybodaeth hwn
- cytuno ar y system briodol o drosglwyddo gwybodaeth yn ddiogel
- cytuno ar yr amserlen ar gyfer rhannu gwybodaeth
- trefnu sesiynau hyfforddiant, codi ymwybyddiaeth a sesiynau tebyg mewn cysylltiad â rhannu gwybodaeth a phrosesau busnes cysylltiedig
- ymdrin â materion a risgiau sy'n codi o'r broses o rannu gwybodaeth
- cynllunio ar gyfer gweithrediadau ar y cyd sy'n gofyn am rannu gwybodaeth.


Atodiad A: Partïon

Mae'r atodiad hwn yn rhestru'r partïon a fydd yn rhannu gwybodaeth â'i gilydd. Y rhai a gofnodir o dan 'Enwau cyswllt y protocol rhannu gwybodaeth' fydd y brif sianel gyfathrebu mewn perthynas â'r protocol rhannu gwybodaeth hwn. Mae'r hyn a gofnodir o dan 'brosesau busnes' yn cyfeirio at unrhyw atodiadau sy'n disgrifio'r ffyrdd y mae AGC ac Ofsted wedi cytuno i gydweithio.

Partner	Prif nodau	Enw cyswllt ar gyfer y protocol rhannu gwybodaeth	Prosesau busnes
Arolygiaeth Gofal Cymru	Arolygiaeth Gofal Cymru (AGC) yw rheoleiddiwr annibynnol gofal cymdeithasol a gofal plant yng Nghymru. Mae AGC yn cofrestru, yn arolygu ac yn gweithredu i wella ansawdd a diogelwch gwasanaethau er lles pobl Cymru.	Kirsty Manton Rheolwr Ansawdd & Gwybodaeth e: AGCGwybodaeth@llyw.cymru	AGC@llyw.cymru
Prif Arolygydd Addysg, Gwasanaethau Plant a Sgiliau Ei Mawrhydi (Ofsted)	Cefnogir Prif Arolygydd Addysg, Gwasanaethau Plant a Sgiliau Ei Mawrhydi gan y Swyddfa Safonau mewn Addysg, Gwasanaethau Plant a Sgiliau (Ofsted). Mae Ofsted yn rheoleiddio ac yn arolygu gwasanaethau sy'n darparu gofal i blant a phobl ifanc, a darpariaeth gwasanaethau addysg y blynyddoedd cynnar a blynyddoedd diweddarach i blant. Mae Ofsted yn arolygu gwasanaethau sy'n darparu addysg a sgiliau i ddysgwyr o oeddrannau eraill.	Matthew Reed Uwch-reolwr Busnes e: EYRegulatoryandSocialCare@Ofsted.gov.uk	scadmin@ofsted.gov.uk

Llofnodwyr

Gellir defnyddio'r Llofnodwyr at ddibenion awdurdodi os dymunir yn lle cadarnhad drwy e-bost.

Partner	Arolygiaeth Gofal Cymru	Prif Arolygydd Addysg, Gwasanaethau Plant a Sgiliau Ei Mawrhydi (Ofsted)
Enw	Margaret Rooney	Yvette Stanley
Rôl	Dirprwy Brif Arolygydd	Cyfarwyddwr Cenedlaethol, Gofal Cymdeithasol
Llofnod		
Dyddiad	27-01-2020	17-02-2020

Atodiad B: Gwybodaeth y gellir ei rhannu

Categori	Disgrifiad	Rheswm dros rannu
Gorfodi	Ceisiadau am Wybodaeth Gwybodaeth a roddwyd i ategu cam gorfodi a gymerwyd gan un o'r arolygiaethau. Mae natur y wybodaeth yn dibynnu ar y cais sy'n dod i law ym mhob achos. Fel arfer gallai hyn gynnwys adroddiadau arolygu a/neu ddatganiadau tystion arolygwyr.	I sicrhau na chaiff camau gorfodi sy'n dibynnu ar rannu gwybodaeth eu llesteirio ac y caiff cymorth ei roi mewn perthynas â'r broses reoliadol a barnwrol.
	Camau gorfodi Camau gorfodi arfaethedig a gwirioneddol a'u canlyniadau. Gall hyn gynnwys Gwasanaethau sy'n Achos Pryder ac achosion llys Sifil a Throseddol.	I godi ymwybyddiaeth o risgiau posibl a gwirioneddol i ddefnyddwyr gwasanaethau o dan amgylchiadau sy'n ymwneud â'r camau gorfodi a'i gwneud yn bosibl i fesurau diogelu priodol gael eu rhoi ar waith.
Pryderon	Mae pryderon sylweddol yn cynnwys unrhyw risg bosibl sylweddol i ddiogelwch, llesiant a hawliau darparwyr gofal, defnyddwyr ac unrhyw drydydd partion cysylltiedig.	I godi ymwybyddiaeth o risgiau posibl a gwirioneddol i lesiant defnyddwyr gwasanaethau, gan ei gwneud yn bosibl i fesurau diogelu priodol gael eu rhoi ar waith a datrys y pryderon ar gam cynharach.
Arolygiadau	Adroddiadau arolwg a dogfennaeth ategol.	I godi ymwybyddiaeth o risgiau posibl a gwirioneddol i ddefnyddwyr gwasanaethau a sicrhau uniondeb y wybodaeth sydd ar gael i'r arolygiaethau.
Cofrestriadau	Ceisiadau, cofrestriadau, datgofrestriadau sydd yn yr arfaeth a datgofrestriadau.	I'w gwneud yn bosibl i groeswrio o ran cofrestriadau a all wneud y canlynol: - diogelu defnyddwyr gwasanaethau rhag camarfer - atal rhai rhag cofrestru os ydynt yn osgoi camau gorfodi neu ddyletswyddau rheoleiddio - caniatáu rhoi buddiannau yn dibynnu ar gofrestru - hwyluso'r gwaith o brosesu cofrestriadau dibynnol.
Strategaeth	Prosesau busnes, gwybodaeth ddienw ddadansoddol a gwaith cynllunio strategol a gweithredol.	I rannu arfer gorau, cysoni datblygiadau strategol, llywio datblygiadau polisi a chefnogi cydweithio gweithredol.
Ymchwiliol	Gwybodaeth a geisiwyd fel rhan o ymchwiliadau i wasanaethau rheoleiddiedig a ddarperir gan bersonau sydd heb gofrestru.	I sicrhau bod yr arolygiaethau yn ymwybodol o waith ymchwilio troseddol a diogelu defnyddwyr gwasanaethau rhag cael gwasanaethau annigonol. Helpu i gyflwyno

Categori	Disgrifiad	Rheswm dros rannu
		tystiolaeth gynhwysfawr mewn unrhyw achosion.
	Y Cyfryngau Gwybodaeth wedi'i choladu ac wedi'i pharatoi i'w chyflwyno i'r cyfryngau.	I roi naratif cydgysylltiedig wrth ymdrin â'r cyfryngau allanol.

Atodiad C: Sail gyfreithiol

Mae'n rhaid bod sail gyfreithiol dros rannu unrhyw ddarn o wybodaeth rhwng yr arolygiaethau.

Mae angen bodloni o leiaf un o'r seiliau cyfreithiol o dan Erthygl 6 o'r Rheoliadau Cyffredinol ar Ddiogelu Data y DU wrth rannu unrhyw ddata personol. Fodd bynnag, os caiff unrhyw ddata categori arbennig eu rhannu rhwng yr arolygiaethau, bydd angen nodi sail gyfreithiol o dan Erthygl 6 o'r Rheoliadau Cyffredinol ar Ddiogelu Data y DU ac amod ar wahân i'w prosesu o dan Erthygl 9. Mae Deddf Diogelu Data 2018 yn nodi'r amodau y gellir dibynnu arnynt.

Dylai'r sail gyfreithiol dros rannu gwybodaeth gael ei chofnodi bob amser at ddibenion archwilio.

Mae Rhan A o'r atodiad hwn yn cwmpasu'r sail gyfreithiol gyffredinol dros rannu gwybodaeth rhwng yr arolygiaethau. Mae Rhan B yn cwmpasu unrhyw rywmedigaethau cyfreithiol sy'n benodol i Ofsted y bydd yn dibynnu arnynt os bydd o'r farn bod angen rhannu gwybodaeth naill ai er mwyn cydymffurfio â rhwymedigaethau cyfreithiol neu wrth arfer swyddogaethau. Lle mae cofnodion yn erbyn partïon yn wag, mae hyn yn nodi y dibynnir ar y sail gyfreithiol yn Rhan A ar gyfer rhannu gwybodaeth.

Mae'r tablau a ddefnyddir yn Rhannau A a B yn nodi'n fras y mathau o wybodaeth a rennir (Allwedd: C: Cofrestriadau; A: Arolygiadau; P: Pryderon; G: Gorfodi; S: Strategaeth), cwmpas y wybodaeth honno a'r sail gyfreithiol dros rannu'r wybodaeth. Mae rhannu gwybodaeth yn aml wedi'i anelu at ddiogelu llesiant defnyddwyr gwasanaethau a sicrhau gweithio mwy cydgysylltiedig rhwng cyrff cyhoeddus. Dangosir amlinelliad o'r ffordd y caiff gwybodaeth a rennir ei defnyddio yn Atodiad B.

Rhan A: Y seiliau cyfreithiol i AGC rannu gwybodaeth ag Ofsted

Partneriaid	C	A	P	G	S	Cwmpas	Sail gyfreithiol
AGC	x	x	x	x		Gwybodaeth sy'n berthnasol i reoleiddio ac arolygu gofal cymdeithasol a gofal plant i ddinasyddion Cymru.	Rhannu data personol Erthygl 6(1)(c) o Reoliad Cyffredinol ar Ddiogelu Data y DU (UK GDPR): Caniatâd i rannu gwybodaeth pan fydd angen gwneud hynny er mwyn cydymffurfio â rhwymedigaeth gyfreithiol; neu Erthygl 6(1)(e) o UK GDPR: Caniatâd i rannu gwybodaeth i ymgymryd â thasg er budd y cyhoedd neu wrth arfer awdurdod swyddogol. Atodlen 2/3: Deddf Diogelu Data 2018: Caniateir datgelu data heb ganiatâd lle y bo angen. Gall hyn gynnwys cydymffurfio â rhwymedigaeth gyfreithiol (fel y'i nodir isod), diogelu buddiannau hanfodol gwrthrych y data, gweinyddu cyfiawnder, ac arfer unrhyw swyddogaethau eraill o natur gyhoeddus sy'n cael eu harfer er budd y cyhoedd gan unrhyw berson; Atodlen 8 i'r Ddeddf Diogelu Data: Caniateir prosesu data at ddibenion atal, ymchwilio, canfod neu erlyn troseddau neu roi cosbau troseddol. Rhannu data Categori Arbennig Erthygl 9(2)(b) o UK GDPR: Rhoddir caniatâd i rannu gwybodaeth pan fydd angen gwneud hynny er mwyn cyflawni rhwymedigaethau ac arfer hawliau rheolydd y data neu wrthrych data ym maes cyfraith diogelu cymdeithasol; Erthygl 9(2)(c) o UK GDPR: Rhoddir caniatâd i rannu gwybodaeth pan fydd angen gwneud hynny er mwyn diogelu buddiannau hanfodol gwrthrych y data. Atodlen 1, Rhan 2 o'r Ddeddf Diogelu Data: Caniateir prosesu data at ddibenion budd cyhoeddus sylweddol: Paragraff 6 pan fydd angen arfer swyddogaeth a roddir drwy ddeddfiad rheolaeth y gyfraith; Paragraff 10 pan fydd angen gwneud hynny er mwyn cyflawni swyddogaethau diogelu penodol sydd â'r nod o ddiogelu aelodau o'r cyhoedd rhag ymddygiad penodol nad yw'n gyfystyr â gweithred anghyfreithlon o bosibl, megis anonestrwydd, anghymhwysedd neu gamreoli. Mae gofynion ychwanegol yn cynnwys y byddai ceisio caniatâd gwrthrych y data yn effeithio ar y dibenion hynny a bod angen

						prosesu data am resymau budd cyhoeddus sylweddol; Paragraff 18 pan fydd angen gwneud hynny er mwyn diogelu plant ac unigolion sy'n wynebu risg. Rhannu data personol a data categori arbennig Rhwymedigaethau cyfreithiol y gellir dibynnu arnynt o ran data personol a data categori arbennig: Adran 182: Mae Deddf Rheoleiddio ac Arolygu Gofal Cymdeithasol (Cymru) 2016 yn gosod dyletswydd ar gorff rheoleiddio i ddatgelu gwybodaeth y mae wedi ei chael wrth arfer ei swyddogaethau perthnasol i unrhyw berson arall os yw o'r farn bod angen datgelu gwybodaeth o'r fath er mwyn diogelu llesiant unigolyn yng Nghymru neu ei bod yn fanteisiol gwneud hynny. Rhan 9: Mae Deddf Rheoleiddio ac Arolygu Gofal Cymdeithasol (Cymru) 2016 yn darparu ar gyfer cydweithredu a chydweithio gan gyrff rheoleiddio wrth gofrestru a rheoleiddio personau sy'n darparu gwasanaethau cartrefi gofal. Mae Deddf Gwasanaethau Cymdeithasol a Llesiant (Cymru) 2014 yn darparu y dylai personau sy'n arfer swyddogaethau o dan y Ddeddf geisio hyrwyddo llesiant pobl y mae angen gofal a chymorth arnynt. Mae'r Ddeddf yn darparu ar gyfer trefniadau i hyrwyddo cydweithrediad rhwng asiantaethau partner er mwyn gwella llesiant plant.
				x	Ceisiadau am wybodaeth sy'n dod i law	Oherwydd natur amrywiol y wybodaeth y gofynnir amdani, caiff y seiliau cyfreithiol dros y rhain eu hadolygu fesul achos unigol gan AGC a chaiff y canlyniadau eu cofnodi ganddi.
				x	Gwybodaeth ddienw a gwybodaeth gyhoeddus	Adran 87, paragraffau (9A), (9B), a (9C): Deddf Plant 1989; Adran 32, (5), (6) a (7): Deddf Safonau Gofal 2000; Adran 40: Mesur Plant a Theuluoedd (Cymru) 2010; Rheoliad 2, paragraffau (2), (3) a (4): Rheoliadau Gwarchod Plant a Gofal Dydd (Arolygu a Gwybodaeth ar gyfer Awdurdodau Lleol) (Cymru) 2010; Adran 36 (3) o'r Ddeddf Rheoleiddio ac Arolygu Gofal Cymdeithasol Mae'r uchod yn darparu ar gyfer rhoi gwybodaeth i'r cyhoedd.

							Nid yw gwybodaeth strategol sydd wedi'i hanonymeiddio (er enghraifft, prosesau busnes neu ddadansoddeg) yn dod o dan y rheoliadau diogelu data a dim ond cytundeb busnes sydd ei angen, nid sail gyfreithiol. Pan gaiff gwybodaeth sensitif ei rhannu (e.e. cydlynu gweithgareddau sy'n ymwneud â'r cyfryngau) mae'n rhaid iddi gael ei chwmpasu o dan y sail gyfreithiol sy'n ymwneud â'r math hwnnw o wybodaeth.
--	--	--	--	--	--	--	--

Rhan B: Y seiliau cyfreithiol sy'n benodol i Ofsted i rannu gwybodaeth ag AGC

Partneriaid	C	A	P	G	S	Cwmpas	Sail gyfreithiol
Prif Arolygydd Addysg, Gwasanaethau Plant a Sgiliau Ei Mawrhydi (Ofsted)	x	x	x	x	x	Gwybodaeth sy'n berthnasol i wasanaethau plant, gwasanaethau mabwysiadu a maethu, ac arolygiadau ac adolygiadau Awdurdodau Lleol yn Lloegr.	Deddf Addysg ac Arolygiadau 2006 Mae Adran 117(2) yn nodi y bydd Ofsted yn cydnabod yr angen i ddiogelu a hyrwyddo hawliau plant wrth gyflawni ei swyddogaethau; yn hyrwyddo'r defnydd effeithlon ac effeithiol o adnoddau; ac yn sicrhau bod unrhyw gamau gweithredu yn gymesur â risgiau. Mae Paragraff 13 o Atodlen 11 yn nodi y gall Ofsted wneud unrhyw beth y mae'n ystyried sy'n ofynnol neu'n ddisgwyliedig at ddibenion ei swyddogaethau neu mewn perthynas â nhw. Mae Adran 119(1) yn nodi y bydd Prif Arolygydd Ei Mawrhydi yn cyflawni ei swyddogaethau er mwyn annog gwelliannau i weithgareddau sy'n rhan o'i chylch gwaith a bod adnoddau'n cael eu defnyddio'n effeithlon ac yn effeithiol wrth gyflawni dyletswyddau o'r fath. Mae Adran 119(2) yn ei gwneud hi'n ofynnol i Brif Arolygydd Ei Mawrhydi i sicrhau bod ei swyddogaethau'n cael eu cyflawni'n effeithlon ac yn effeithiol. Mae Adran 119(3) yn ei gwneud hi'n ofynnol i Brif Arolygydd Ei Mawrhydi gydnabod yr angen i ddiogelu a hyrwyddo hawliau plant. Mae Paragraff 6 o Atodlen 12 yn nodi y gall Prif Arolygydd Ei Mawrhydi wneud unrhyw beth y mae'n ystyried sy'n ofynnol neu'n ddisgwyliedig at ddibenion ei swyddogaethau neu mewn perthynas â nhw.

						Mae Paragraff 8 o Atodlen 13 yn nodi y gall Prif Arolygydd Ei Mawrhydi roi cyngor neu gymorth i awdurdod cyhoeddus arall at ddiben sicrhau bod yr awdurdod hwnnw yn cyflawni ei swyddogaethau. Mae Adran 153 hefyd yn nodi y gall y wybodaeth a geisir gan Brif Arolygydd Ei Mawrhydi mewn perthynas ag unrhyw un o'i swyddogaethau gael ei defnyddio ar gyfer unrhyw un o'i swyddogaethau eraill. Deddf Safonau Gofal 2000 Ofsted yw'r awdurdod cofrestru ar gyfer cartrefi plant, canolfannau preswyl i deuluoedd, cynlluniau gwyliau preswyl i blant anabl, asiantaethau maethu, asiantaethau mabwysiadu gwirfoddol ac asiantaethau cymorth mabwysiadu yn Lloegr ac mae ganddo'r pŵer i'w harolygu. Wrth gyflawni ei swyddogaethau o dan y Ddeddf Safonau Gofal, mae Ofsted yn ceisio data personol am y perchenogion, rheolwyr a chyflogeion darparwyr gofal yn ogystal â data personol am blant, eu rhieni neu unigolion cysylltiedig eraill. Rydym yn prosesu ac yn rhannu'r wybodaeth honno gan ddefnyddio'r pwerau yn Neddf Addysg ac Arolygiadau 2006.
--	--	--	--	--	--	---



Mae'r Swyddfa Safonau mewn Addysg, Gwasanaethau Plant a Sgiliau (Ofsted) yn rheoleiddio ac yn arolygu i gyflawni rhagoriaeth wrth ofalu am blant a phobl ifanc, ac ar gyfer addysg a sgiliau dysgwyr o bob oedran. Mae'n rheoleiddio ac yn arolygu gofal plant a gofal cymdeithasol plant, ac yn arolygu'r Gwasanaeth Cyngori a Chynorthwyo Llys i Blant a Theuluoedd (Cafcass), ysgolion, colegau, hyfforddiant cychwynnol i athrawon, sgiliau ac addysg bellach, dysgu oedolion a'r gymuned yn ogystal ag addysg a hyfforddiant mewn carchardai a sefydliadau diogel eraill. Mae'n asesu gwasanaethau plant y cyngor ac yn arolygu gwasanaethau i blant sy'n derbyn gofal, diogelu ac amddiffyn plant.

Os hoffech dderbyn copi o'r ddogfen hon mewn fformat gwahanol, megis print mawr neu fersiwn Braille, ffoniwch 0300 123 1231, neu anfonwch e-bost at enquiries@ofsted.gov.uk.

Cewch aildddefnyddio'r wybodaeth hon (ac eithrio logos) yn ddi-dâl, mewn unrhyw fformat neu gyfrwng, o dan delerau'r Drwydded Llywodraeth Agored. I weld y drwydded hon, ewch i www.nationalarchives.gov.uk/doc/open-government-licence, neu gallwch ysgrifennu at The Information Policy Team, The National Archives, Kew, London, TW9 4DU, neu anfon e-bost at: psi@nationalarchives.gsi.gov.uk.

Mae'r cyhoeddiad hwn ar gael yn www.gov.uk/government/organisations/ofsted.

Diddordeb yn ein gwaith? Gallwch danysgrifo i dderbyn ein cylchlythyr misol i gael rhagor o wybodaeth a diweddariadau: <http://eepurl.com/iTrDn>.

Piccadilly Gate
Store Street
Manchester
M1 2WD

T: 0300 123 1231
Ffôn testun: 0161 618 8524
E: enquiries@ofsted.gov.uk
G: www.gov.uk/ofsted

Rhif 190044

© Hawlfraint y Goron 2020